



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo

GRADSKO VIJEĆE

Odluka
o standardima i kriterijima za imenovanje pravobranioca i zamjenika pravobranioca
Pravobranilaštva Grada Sarajeva
(Prijedlog)

Predlagač: Gradonačelnica
Obradivač: Stručna služba
gradonačelnice Grada Sarajeva

Sarajevo, decembar 2021. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 6. i 7. Zakona o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, br. 12/03, 34/03 i 65/13), člana 45. i člana 46. Zakona o pravobranilaštvu („Službene novine Kantona Sarajevo“, broj 33/08 – Novi prečišćeni tekst, 7/12 i 44/16), člana 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), te člana 16. i člana 17. Odluke o osnivanju Pravobranilaštva Grada Sarajeva („Službene novine Kantona Sarajevo“, br. 20/10, 30/15, 12/17 i 41/21), Gradsko vijeće Grada Sarajeva na __. sjednici održanoj dana __. __. 2021. godine, donijelo je

(Prijedlog)

**Odluku
o standardima i kriterijima za imenovanje pravobranioca i zamjenika pravobranioca
Pravobranilaštva Grada Sarajeva**

Član 1.

(Predmet)

Ovom odlukom utvrđuju se standardi i kriteriji za imenovanje pravobranioca i zamjenika pravobranioca Pravobranilaštva Grada Sarajeva.

Član 2.

(Opći uslovi)

- (1) Kandidati za pravobranioca i zamjenika pravobranioca moraju ispunjavati sljedeće opće uslove:
- da su državljani Bosne i Hercegovine;
 - da su stariji od 18 godina;
 - da nisu otpušteni iz državne službe kao rezultat disciplinske mjere na bilo kojem nivou vlasti u BiH u periodu od tri godine prije dana objave upražnjene pozicije;
 - da se na njih ne odnosi član IX 1. Ustava Bosne i Hercegovine;
 - da nisu na funkciji u političkoj stranci.

Član 3.

(Posebni uslovi)

- (1) Pored navedenih općih uslova, kandidati za pravobranioca i zamjenika pravobranioca Pravobranilaštva Grada Sarajeva moraju da ispunjavaju i sljedeće posebne uslove:
- da je diplomirani pravnik ili Bakalaureat/Beachelor prava sa ostvarenih 240 ECTS studijskih bodova Bolonjskog sistema studiranja;
 - da ima položen pravosudni ispit;
 - da ima iskustvo u radu na imovinsko-pravnim poslovima u pravobranilaštvu ili pravosudnim organima ili drugim državnim organima ili preduzećima ili drugim pravnim licima u trajanju od najmanje tri (3) godine, nakon položenog pravosudnog ispita;
 - da posjeduje najviše moralne osobine za obavljanje službe pravobranilaštva.

Član 4.

(Poželjni uslovi)

- (1) Prilikom utvrđivanja rang-liste najboljih kandidata, prednost će imati kandidati koji:
- imaju položen specijalistički ispit, i to advokatski ili sudijski ili notarski ispit;
 - su dobitnici priznanja;
 - imaju iskustvo u više pravnih oblasti;
 - su postigli uspješne rezultate tokom karijere i druge okolnosti relevantne za obavljanje službe pravobranilaštva.

- (2) Kandidati koji dokumentovano dokažu postojanje nekog od uslova iz stava 1. alineja 1 do 4 ovog člana, prilikom sačinjavanja rang-liste najboljih kandidata (lista uspješnih kandidata), bodovat će se sa po 5 (pet) dodatnih bodova za svaki pojedinačni poželjni uslov koji ispunjavaju iz alineje 1 do 4.

Član 5.

(Javni oglas)

- (1) Javni oglas za upražnjenu poziciju pravobranioca i/ili zamjenika pravobranioca Pravobranilaštva Grada Sarajeva u skladu sa kriterijima ove odluke objavljuje gradonačelnica Grada Sarajeva.
- (2) Oglas iz stava 1. ovog člana objavljuje se u „Službenim novinama Federacije BiH“ i najmanje jednom dnevnom listu velikog tiraža s ciljem da bude dostupan najširoj javnosti.
- (3) Javni oglas za upražnjenu poziciju pravobranioca i/ili zamjenika pravobranioca Pravobranilaštva Grada Sarajeva treba da sadrži:
- opis upražnjene pozicije;
 - opće uslove koje treba da ispunjavaju kandidati;
 - posebne uslove koje treba da ispunjavaju kandidati;
 - poželjne uslove koje treba da ispunjavaju kandidati;
 - spisak potrebne dokumentacije;
 - način, mjesto i rok podnošenja prijava.
- (4) Javni oglas o upražnjenoj poziciji treba biti dovoljno detaljan kako bi kandidatima dao cjelovitu informaciju o ulozi koju treba obavljati, uslovima službe i dužini trajanja imenovanja, te mogućnosti ponovnog imenovanja.
- (5) U oglasu o upražnjenoj poziciji mora se jasno naglasiti da oni podnosioci prijava sa kojima se ne stupa u kontakt u određenom roku, a nakon roka za podnošenje prijava, neće biti uzeti u razmatranje u daljnjem procesu imenovanja te da se neće dostavljati pisane odbijenice kandidatima koji ne ispunjavaju uslove.

Član 6.

(Komisija)

- (1) Gradonačelnica Grada Sarajeva svojim rješenjem imenuje Komisiju za izbor na poziciju pravobranioca i/ili zamjenika pravobranioca iz reda državnih službenika.
- (2) Komisija iz stava 1. ovog člana se sastoji od pet (5) članova i prilikom imenovanja članova komisije, gradonačelnica Grada Sarajeva će voditi računa o tome da članovi komisije, po mogućnosti, budu lica koja poznaju odredbe Zakona o ministarskim, vladinim i drugim imenovanjima i koja posjeduju stručno znanje u oblastima za koju se vrši imenovanje.

Član 7.

(Rad komisije)

- (1) Komisija za izbor na poziciju pravobranioca i/ili zamjenika pravobranioca pregledat će sve prijave koje stignu u propisanom roku.
- (2) Na osnovu ove odluke i principa iz člana 3. Zakona o ministarskim, vladinim i drugim imenovanjima, Komisija će sastaviti listu s užim izborom najboljih kandidata koji ispunjavaju kriterije za imenovanje i sve ih pozvati na intervju.
- (3) Nijedan kandidat neće biti stavljen na listu s užim izborom ukoliko mu je prijava neblagovremena ili nepotpuna ili nije povoljno ocjenjen prema kriterijima iz ove odluke.

- (4) Prilikom pozivanja kandidata na intervju, svaki kandidat mora ispuniti obrazac u kojem će iznijeti bilo koje pitanje ili mogućnost koja bi mogla dovesti do sukoba interesa u slučaju da dođe do njegovog imenovanja.
- (5) Komisija za izbor će prije intervjua zahtijevati da kandidati koji su ušli u uži izbor daju podatke o odgovarajućem broju ranijih neposrednih rukovodilaca od kojih mogu dobiti preporuke i informacije o kandidatima.
- (6) Tokom intervjua, komisija za izbor će osigurati sljedeće:
 - da su svi kandidati u potpunosti upoznati sa standardom osobnog integriteta koji se traže za osobe imenovane na javnu poziciju;
 - da su pitanja o sukobu interesa objašnjena i razmotrena detaljno svim kandidatima;
 - da su svi kandidati u potpunosti informirani o pravu javnosti i da mogu uložiti prigovor protiv imenovanja koje se razmatra.
- (7) Sve odluke, uključujući i one koje sadrže odbijenice, moraju u potpunosti biti dokumentovane i moraju se čuvati u Gradskoj upravi.

Član 8.

(Rang-lista najuspješnijih kandidata)

- (1) Nakon intervjua i na osnovu u potpunosti dokumentovanih odluka svakog člana komisije, sačinjenih uz poštivanje odredbi Zakona i ove odluke, Komisija za izbor će putem pisane preporuke predložiti rang-listu sa najboljim kandidatima (listu uspješnih kandidata) gradonačelnici Grada Sarajeva na daljnje razmatranje.
- (2) Pisana preporuka iz stava 1. ovog člana sadrži sve relevantne informacije koje komisija ima o kandidatima i njene preporuke.
- (3) Smatra se da je kandidat koji je prvi na rang-listi i kojeg je preporučila većina članova komisije, najuspješnije prošao otvorenu konkurenciju.

Član 9.

(Odluka o konačnom imenovanju)

- (1) Prijedlog kandidata za imenovanje na poziciju pravobranioca i/ili zamjenika pravobranioca Pravobranilaštva Grada Sarajeva, gradonačelnica Grada Sarajeva dostavlja Gradskom vijeću na razmatranje i odlučivanje.
- (2) Gradsko vijeće, nakon razmatranja prijedloga imenovanja, donosi odluku o konačnom imenovanju.

Član 10.

(Objavljivanje)

Konačno imenovanje pravobranioca i/ili zamjenika pravobranioca Pravobranilaštva Grada Sarajeva od strane Gradskog vijeća, objavljuje se u „Službenim novinama Kantona Sarajevo“.

Član 11.

(Prigovor)

- (1) Na konačno imenovanje pravobranioca i/ili zamjenika pravobranioca Pravobranilaštva Grada Sarajeva kandidat kao zainteresovana stranka ima pravo podnošenja prigovora na konačno imenovanje.
- (2) Prigovor se podnosi Gradskom vijeću Grada Sarajeva, a kopija se dostavlja Ombudsmenu za ljudska prava Bosne i Hercegovine.

- (3) Pisani odgovor na prigovor dostavlja se u roku od 14 dana od dana kada je prigovor podnesen Ombudsmenu za ljudska prava Bosne i Hercegovine.

Član 12.

(Stupanje na snagu)

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVAJUĆI GRADSKOG VIJEĆA

Jasmin Ademović

Broj:
Sarajevo,

OBRAZLOŽENJE

PRAVNI OSNOV

Pravni osnov za donošenje Odluke sadržan je u;

- članu 6. i članu 7. Zakona o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, br. 12/03, 34/03 i 65/13), kojima je propisano da se sva imenovanja vrše u skladu sa odredbama citiranog Zakona i uz propisane i utvrđene standarde i kriterije;
- članu 45. i članu 46. Zakona o pravobranilaštvu („Službene novine Kantona Sarajevo“, broj 33/08 – Novi prečišćeni tekst, 7/12 i 44/16) kojima je propisano da gradskog, odnosno općinskog pravobranioca i njegovog zamjenika imenuje, smjenjuje i razrješava Gradsko, odnosno Općinsko vijeće na prijedlog gradonačelnika, odnosno općinskog načelnika, kao i uslovi za imenovanje na naprijed navedene pozicije;
- članu 26. stav 1. tačka 2. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), kojim je propisano da Gradsko vijeće donosi odluke, druge propise i opće akte i daje njihovo tumačenje;
- članu 16. i člana 17. Odluke o osnivanju Pravobranilaštva Grada Sarajeva („Službene novine Kantona Sarajevo“, br. 20/10, 30/15, 12/17 i 41/21), kojima je propisana nadležnost organa za predlaganje i odlučivanje o imenovanju na ovu poziciju, kao i uslovi za imenovanje na predmetne pozicije.

RAZLOZI ZA DONOŠENJE

Zakonom o ministarskim, vladinim i drugim imenovanjima Federacije Bosne i Hercegovine, Zakonom o pravobranilaštvu, kao i drugim propisima, regulisana je oblast koja je predmetom ove odluke.

Obzirom da se u prethodnom periodu javila objektivna potreba za preciziranjem standarda i kriterija za imenovanje na poziciju pravobranioca i zamjenika pravobranioca Pravobranilaštva Grda Sarajeva, kako od strane pojedinih radnih tijela Gradskog vijeća Grada Sarajeva, tako i od strane većine Gradskih vijećnika, to je gradonačelnica Grada Sarajeva, uvažavajući iznesene primjedbe, prijedloge i sugestije naprijed pomenutih organa i tijela, kroz predloženi akt sublimirala izneseno i utvrdila prijedlog akta kroz čije odredbe su ispoštovane iznesene inicijative, uz poštivanje zakona i propisa koji regulišu oblast izbora i imenovanja na ove pozicije.

FINANSIJSKA SREDSTVA

Za realizaciju Odluke nisu potrebna dodatna finansijska sredstva.